

ROZÁRIU EPIFANIA NIAN

Introdusaun

Magu sira la hola parte ba povu Israel no eventu ne'ebé iha-ne'ebé sira sai protagonista manifesta Jezús nia mai ba ema husi rasa no fatin hotu rai nian. Magu sira hatene rona, halo dalan, adora no rekoñese, ho oferta sira-nia don nian, Jezús nia realeza. Enkuantu Erodes, poder, foti-an no inveja halo nia matan-delek, halo nia haree Kosok-Oan moris iha balada nia luhan nu'udar obstakulu atu reliza ninia reinu iha rai ne'e. Nune'e nia fó orden atu halo masakre ba ki'ik-oan sira hotu ho finalidade atu oho Jezús, depoizde hatene tiha informasaun katak Nia moris iha rai Belém.

Hodi medita Rozáriu Epifania nian, ita harohan ba moris ne'ebé moris daudaun no halo reparasaun ba salan grave abortu nian, tanba Erodes barak ita-nia tempu ninia hahalok, ne'ebé legaliza abortu, oho inosente sira, nega direitu moris nian.

Ita dirije ba Maria ita-nia orasaun, konfia ba Jezús Kosok-Oan kauza ba moris no husu Santu Magu sira-nia harohan daet ba ema sira ne'ebé halo hahalok violénsia la umanu ida-ne'e no hahalok oho inosente sira iha funu sira atu bele konverte sira-nia an.

1° MISTÉRIU: Wainhira Jezús moris iha Belém iha rai Judeia, ema matenek balun husi loro-sa'e to'o ba Jerusalém atu buka Kosok-Oan Judeu sira-nia liurai no bele tuku tur hanai ba Nia.

Ema sira ne'ebé la hatene Maromak mós bele hetan Nia, se sira hatene lee sinál sira kriaun no istória nian. Viajen naruk ne'ebé Ema Matenek sira husi Loro-Sae halo atu hasoru Liurai Lalehan no Rai nian mak sinál kona-ba dalan ne'ebé ema ida-idak tenke halo atu hasoru Na'i, Kriadór no Autór moris nian.

Ita harohan:

Oh Maria, Fitun Dadeersaan nian, hanorin ami atu lee "sinál sira tempu nian", leno ami-nia dalan no gia ami ba hasoru Maromak ne'ebé moris nu'udar kosok-oan ba ami-nia salvasaun. Jezús nia Inan no ami-nia Inan, ita ne'ebé loke odamatan sira moris nian, halo atu la iha inan ida taka odamatan ne'e: leno inan sira ne'ebé laran rua-rua ka hetan presaun, atu simu oan ne'ebé sira ko'us iha knotak no husik nia moris.

Ami Aman, Ave Maria 10, Glória.

2° MISTÉRIU: Erodes ne'ebé hakfodak tebtibes ba liurai foun nia moris, no maski konsulta matenek sira ninia kadunan nian, nia planu atu oho Kosok-Oan ne'ebé nia haree nu'udar perigu ba ninia poder.


Buat foun hotu lori hakfodak no hamosu ta'uk. Erodes, ne'ebé belit liu ba ninia foti-an no ninia hakaran poder nian, la iha kapsidade atu rekoñese grasa divina ne'ebé liu no haree iha Ki'ik-Oan ne'e inimigu ba ninia hamrook ba poder nune'e hanoin atu elimina problema ne'e ho omisídiu.

Ita harohan:

Oh Maria, Inan konsellu di'ak nian, hanorin ami atu hakat liu soim sira mundu ne'e nian; hanorin ami hakribi kaan-teen sira, arrogánsia sira, egoísmu, orgullu, indiferensa, dezakordu no rai-kunan hotu ne'ebé halo ami fahe malu; hanorin ami atu moris iha laran-luak no karidade, nune'e bele simu Jezús iha maluk sira ne'ebé terus. Inan mizerikórdia nian, ami husu grasa perdaun no konversaun nian ba ema sira ne'ebé nega don moris nian ba oan ne'ebé sira ko'us no ema sira ne'ebé tulun atu oho bebé inosente sira.

Ami Aman, Ave Maria 10, Glória.

3° MISTÉRIU: Profesia tempu uluk nian fó sai ona katak liurai-mesias sei moris iha David nia sidade, nune'e Magu sira kontinua sira-nia dalan ba Belém. Oras-ne'e fitun hatudu an fali, gia sira no hatudu loloos fatin ne'ebé sira tenke para.



Sagrada Eskritura mak roman mós ba fitun sira: se Magu sira la rona Maromak nia Liafuan husi Profeta sira, sira mós sei la hetan naroman husi fitun ne'ebé gia sira ba Jezús.

Ita harohan:

Oh Maria, hun sabedouria nian, hatudu mai ami mós “fatin” iha-ne'ebé ami tenke para atu hetan Jezús. Iha ami-nia halai no fadigadu sira loroloron nian, halo atu ami bele hetan fatin no tempu ba Nia, liuhusi orasaun, raronak, meditasaun Evanjellu nian no partisipasaun ativa no devota ba Santa Missa no Sakramentu Rekonsiliaun nian. Inan Moris nian, fó bensan ba oan sira iha knotak no foin moris, atu sira bele hala'o Maromak nia projetu to'o rohan; proteje no tulun moris ne'ebé iha inan nia knotak; tulun família sira ho oan barak no sira ne'ebé iha difikuldade atu lroi ba oin no eduka oan sira ne'ebé Maromak haraik ba sira.

Ami Aman, Ave Maria hananu, Glória.

4° MISTÉRIU: Hare ki'ik-oan, sira tuku tur ba rai hodi adora Nia, hori rekoñese iha Nia nu'udar Liurai no Makso'in ba ema, tribu, povu no nasaun hotu.

Jestu adorasau Magu sira-nian iha Jezús Kosok-Oan nia oin mak sinál sira-nia fuan moos nian: sira haree Jezús Kosok-Oan, rekoñese Nia nu'udar Maromak no saran sira moris ba Nia.

Ita harohan:

Oh Maria, Inan Domin nian, hanorin ema hotu atu rekoñese ita Oan Jezús nia divindade no realeza, nune'e tuir ezemplu Magu sira-nian, ho haraik-an boot sira bele adora nia nu'udar Liurai, liurai hotu nian. Halo ita-nia karidade buras iha ema sira ne'ebé tau matan ba labarik sira, edukadór/a sira, haraik ba sira ita-nia pasiénsia no ternura inan nian, atu sira sai misionária/u loloos ita-nia domin nian iha-ne'ebé iha labarik ne'ebé iha nesiedade no iha terus.

Ami Aman, Ave Maria 10, Glória.

5° MISTÉRIU: Tuir lisan no kostume uluk nian, Magu sira oferese prezente simbóliku no folin boot ba Liurai-Oan ne'ebé foin moris: osan-mean, ai-been morin no mina-morin.

Prezente dahuluk sira ne'ebé Kosok-Oan Divinu simu nakonu ho signifikadu no hatudu katak Magu sira hatene husi kedas sira-nia viajen nia inísiu sé mak sira sei hasoru: osan-mean nu'udar omenaejn ba liurai, insensu atu sunu nu'udar adorasau ba ninia divindade no mina-morin nu'udar preparasaun ba ninia mate iha ritu hakoi nian.

Ita harohan:

Iha Jezús Kosok-Oan nia Oin, ita loke ita-nia ai-balun no ita haree katak dalabarak nia mamuk laho domin. Oh Maria, modelu haraik-an nian, tulun ami sai ki'ik-oan, atu bele sai boot iha Maromak nia Reinu. Hanorin ami atu hadomi hanesa ita: ho larna-luak, laho interese, laho sasukat, hanesan ita hadomi ita Oan Jezús. Halo atu ema hotu hatene lia-loos Natál nian no atu ema hotu hatene katak Jez'us mai atu lori domin, roman, ksolok, lia-loos no damen. Ami saran ba ita-nia domin inan nian ki'ik-oan hotu ne'ebé família sira la hadomi, sira ne'ebé inan-aman abandona, trata aat no esplora, ki'ik-oan sira ne'ebé labele defende an, vítima violénsia no umillasaun nian.

Ami Aman, Ave Maria 10, Glória.

Ladaiña ka knananuk marianu ida.